

Giachen Giusep Monn, Rueras/Domat



Ils 20 d'octobre 1931 ei Giachen Giusep Monn naschius a Rueras sco emprem affon dalla giuvna famiglia Sep Antoni Monn e Georghina naschida Maissen. El suondan aunc sis fargliuns, aschi che si' affonza ei senza dubi stada enrihida da bia veta e legria. Denton pil Giachen Giusep ei quei buca adina stau il cass. Malsognas han meinsvart sfurzau el da bandunar la carezada famiglia e serender egl jester a far curas.

Vargaus il temps regular da scola tucca ei al Giachen Giusep, sco a biars da sia vegliadetgna da serender egl jester per segidar culs geniturs ed empender il lungatg tudestg. A Berna anfla el ina tschecca plazza tier la

Confederaziun. Paucs onns pli tard ein entgins da ses fargliuns medemamein suandai il Giachen Giusep, essend el mirau e procurau per els bunas pazzas.

Igl onn 1957 ei Giachen Giusep maridaus. Dalla letg sortescha in fegl. Quels onns cruscha ina nauscha e rara malsogna la veta dil Giachen Giusep. Per liungs temps sto el serender en spitals e clinicas specialas. Entras quei sesenteva el negliu da casa. Avon biabein vegn onns anfla el in niev da casa a Domat. Leu nua el spert contact cun convischins dalla patria. Biars onns segida el cun la famiglia Cavegn; el ei gideivels en casa ed iert. Plitard eis el stau in bien cumpogn da veta per la vieua Maria Cavegn. Savens e bugen serendeva el dalla val siado per visitar la patria, siu vitg natal da Rueras e ses parents ed enconuschents. Tier tut igl auter fuva il Giachen Giusep cuntents; el entupav'ins il pli savens cun tschera rienta. Siu grond plascher fuvan visetas e telefons dad enconuschents ed oravontut dil fegl Giancarlo.

Ils 30 d'octobre 1996, a caschun d'ina sepultura, vegn el sez clamaus dil Segner en casa perpetna. Siu ruaus perpeten anfla el sil santeri da s.Vigeli. Biars convischins han accumpignau il Giachen Giusep sin siu davos viadi. El ruaussi en pasch.